



皇甫司勳集卷之一

吳郡

皇甫澹子循

撰

賦六首

禱雪南郊賦

歲屠維赤奮若兮朔易正乎玄英歷固閉於暢月
兮練望幾之翌辰

皇帝有事於南郊禱也何禱爾繫鱗運之迅僚兮
氣憺慄而歲蕤詫陰伏之莫競兮恒暘若而淹期
金方傷而木沴兮亟春令於僭差薄冰履而易冶
兮杲日出其尚熙虞介蟲之為孽兮終旱瘵而癘

滋豈嘉承之弗嗣兮胡元元之逢此懼也先是
天子祇祓宗伯崇禋野廬清術司烜絳旻氈邸閱
掌次之則旌門詰羽林之兵是旦也冒霍蒙合爛
粲星陳望舒先扶飛廉後奔張急繕以按招搖之
隊振殷鞞而走夔魑之神

天子乃離齋宮辭靜室侑方祇欵太一馳道既警
乘輿乃出雲引縣常飈分列戟駟文螭之慘纒兮
六素虬之絡繹翳端路之翠華兮旅中庭以蒼壁
樹羽崇牙執紱秉翟鼉鼓金鏞雞竿玉戚雖九奏
之樂未宣而萬舞之佾咸集少焉清塵起而烟煴

於屬車紫熏颺而苾芬乎越席紛總總其將雅兮
班莪莪之入覲惟弼張其在宵兮衣綵縹其歛敬
玉佩銷而陸離兮金鋪鬱其晻映

天子于是乎奏芝檢而遵壇屏華蓋之承宸儀改
步於靈陛兮緬稽首乎帝閣肆普淖之充簋兮縮
嘉粟之盈罇既而

皇命祝史爲我敷詞愬睿圖於憑翼兮庶明徵其
鑒之悅陟降之弗爽兮豈湏搖而逝斯禱曰鬢雲
爲我興連氛爲我積噫不周其惠來影扶桑其暫
暱闕西域啓東國剪瓊蘂之六靈染瑤壇之一色

燔柴焰而霰燼兮醴酒凝而冰瀝拂旋途兮絮爲
旂擁回鑿兮玉爲軾藹藹浮浮漉漉奕奕普潤中
田偃液上陌夏白青之衰丈兮兆豐年於盈尺率
土播謠乎兩岐兮踰沙受獻於三春斯萬姓洽其
懽心而百神歆其明德者也有若酣璇臺舞瑤室
端皮弁曳豹舄將獵之鉞山驚於萍澤則非所以
掩身安形而亦亾裨於昭假焉矣廼有新進小臣
叨扈從覲盛節第嘉頌揚休烈辭曰禋粥粥其
帝軫維兮維匪血胤恫吾黎兮 帝赫延竚神宴
娛兮登我百穀戎叔爲兮課功減五三與偕兮菟

園者誰負薪咨兮工賡黃竹帝考祺兮

陽湖草堂賦

王子庭濱於陽湖遂肯堂焉以藏以修乃自謂陽
湖子而人亦曰陽湖先生云嘉靖上章攝提格玄
月旣望爰自國子博士拜陪都之祠曹臨觴愴別
抽筆而爲之賦其辭曰

若夫揚州之大澤吳郡之具區有五湖焉是亦天
下之至水也胥貢注其上善洮滂瀉其玄靈別有
一派滙爲陽城表淞潞之神委混崐沫之巨津光
涵金鼎波撼洞庭奔溜則三方灌溉吹澇則百川

沸騰漫滅盡瀆漩濶澎湃澹澹澗疊躍滴湟砢磕消
網澮絡蝨襟嶮帶駭浪雲間驚濤天外爾乃响雷
激電泐霧蒸烟洸洸汨汨汗汗汨汨粲若錦濯爭
若練懸蘋藻擾溺葵蓼新鮮翹莖漢菓翠翳穎潛
魚龍出沒鷗鷺聯翩豈返歷陽於一夕盡底定宸
澤而借之千年矣宛中央之美人兮紛淖約而鑒
德敞茗亭之邃構兮臨清沚而嘉客此亦足以大
觀寧必彼焉是適爾乃褰荷裳兮曳蘭佩擢桂楫
兮方松舟旣將進而容與復欲去而淹留望洋向
以增歎溯洄從而莫逮于是幽壑斂霏他山吐月

采芙蓉雜杜若喁赤鱗狎玄鶚酌味歎以興思悅
乘虛而超忽若石鴈杳冥金牛性誕孫啼或神徐
酣終幻爾若澄江對謝炎海浮張匪智斯樂亦情
相忘若夫釣渭之叟飢泌之士服在王官媚于天
子極北九重江南萬里俟濟川以歌說將歸湖而
覓蠡

瑞爵軒賦

癸巳玄月之吉曲梁令式燕于堂凡我僚友暨幕
屬若而人咸預下陳觴一行有黃雀集于堂隅少
則搶掄而起騰躍而上北向雲霄莫知所止邑珉

請曰瑞哉瑞哉雀爵之義也黃中之色也君侯握
爵中朝殆不遠矣在昔董仲令不其雀乳廳事前
桑民為歌頌吾儕小人敢效茲為皇甫子讓之再
乃題軒之楹曰瑞爵而為之賦辭曰

繫式燕之自公兮寔撰吉於茲辰敞初筵之秩秩
兮藹來止之薰薰被宮商於雅奏兮薦脾臄之雜
陳賓酬主而百拜兮觴引滿於一行乃有黃雀止
于華軒若鼓若舞載翻載翩暫窺檐於下集兮終
軼漢而遐騫僉馳目於罕覲兮倏矯首而去旃嗟
伊鳥之弱羽兮粲瑤光之景星飾元吉以為裳兮

錫憑霄之令名於時也仰無茂樹俯無白糧豈綴
綵之汝求兮遂避珠而我翔儼依人而响响兮儷
嘉賓之在堂孰為來哉氓曰君侯之慶也若夫潘
氏徵有魏生占手性狎陳前聲蜚崔後諒昭德而
匪愆謂報恩乎奚有又若獻自西域集彼東園出
貝多而迅翮望舍章而奮翰非鴛非鷺非鸚非鵬
同海鷺之呈瑞並谷鶯以遷喬物雖細而表大兮
福無門惟自召紛吾扈此南金兮世方慕乎孔翠
展好爵之爾縻兮願乘軒而列位流清音於以侑
兮醢赭顏而既醉瑕時潛之方翕兮亦利賓其用

舉晞上林之寵珍兮巢桂實而容與傷世網之我
嬰兮聊斂翼乎茲處苟一枝足依兮又焉假夫全
樹爾乃揖上客感微禽命芳酌揮瑤琴爰紀其事
以慰我心亂曰園有矰繳鴻則罹兮野有枳棘鸞
則栖兮劇途黯黑鳴梟鴟兮割鮮鼎俎委衆雛兮
鳳翔千仞盍攬輝兮鵬絕雲氣鷄見嗤兮嗟嗟黃
鵠志安知兮相彼鳥矣將鳧飛兮

義鵠賦

余客居陪京嘗養鵠十餘尋被流言將圖歸計乃
命童子悉放之一鵠夜去晨來徘徊瞻顧意若戀

戀因感而作賦焉詞曰

何斯禽之靈哲兮乃戀主而踟躕若含意兮未展
猶弔影以相於遶空梁以託宿兮慨故棲之在除
方其馴擾晨軒和鳴夕砌飲啄閒暇毛羽鮮麗或
命侶以將雛奉清光以娛稚顧以鳥而養鳥胡觀
仁而取義逮其主人不樂羣鵠已辭翼將翔而復
止聲暫背而仍依豈無匹而守獨舍寥廓而安卑
似楚姬之怨別類田客之相隨痛雞鶩之騫舞兮
俾鸞鳳爲之摧頽之冥鴻之遐舉兮悼鸚鵡之罹
災衆方嫉余之脩能兮鳥何意而憐才若夫雀處

堂而孔懼兮鵬止舍而賈悲翳鴿非野鳥兮奚昭
慝而示危又若海鷗不驚庭爵斯集愧未盡乎塵
機亦何徵於報德若其張仲之廬乍偃翟公之門
尚開朱生絕謁以謝徃敬通却掃而杜來世之喪
道人亦何心昔時結駟今日遺簪請息交於良友
恐負誚於微禽

感別賦

戊申之秋八月初吉季弟水部郎子約以制滿還
闕而余羈紲都亭移書告別發函披誦悲不能勝
嗟乎丈夫之生自懸弧矢以來孰不有志於四方

故曰人豈鹿豕也而可常聚乎此光祿之賦惜其
淵雲詞靡而病於兒女情多蓋別不足以興悲而
情有所感於別則悲可知矣因譔茲賦以代餞云
爾辭曰

別方異緒離狀殊端在有情而必歎豈同氣而能
堪輶車陳於垆側舟楫戒於江干或感慨於川逝
或行嗟乎路難涕臨觴而共枚心執袂而俱酸善
哉江生之言曰黯然而銷魂值我愛弟邁徃

帝閣愧雙鵠之並舉兮矯乘鴈而孤騫若夫未營
四方聊事一室侍讌庭闈聯經几席辯索研墳遊

璣討曆繹孟氏之有三詠詩人之旣翕至其恭承
嘉惠忝竊龍光仲兮叔兮乃以軒而以翥伯也季
也復載翽而載翔或影纓於建禮或結綬於文昌
或馳麾於趙魏或沿牒於楚湘乍垂雲雨少別關
山旌指洛而將赴裘滯秦而未還行行路何極去
去情不忍寄芳草於春池攬素毛於秋省夏暑溽
而扇違冬飈厲而衾冷顧奚別而非悲抑奚悲而
云甚迨夫丁辰荼酷軫患纏絲乾覆奄奪慈景俄
殲悼金昆之脆質凋玉樹於華年同朝露之溘盡
展夜壑之已遷繫慶往而弔來亮福倚而禍伏

狼逞兇蜂蠆隱毒構曾參爲殺人收張儉而屬吏
謂死灰其不燃詫凝脂之可畏投清流使合汙惡
獨醒而強醉胡人心之險巇兮亦天道之冥昧賂
苟輸而在宥兮囊無金之可致鄒投珠而遭眚兮
和抱壁而蒙冤乏文姬以請駟兮望融弟爲急原
得與喪其齊塞兮退未遂而觸藩肆蒼鷹之亂紀
兮寔桀犬之餘孽墮東晉之玄風兮點西州之英
烈誰百口其相明兮空撫鏡而存舌中郎奮於鉗
徒兮應相起於溺摺尚錄過於代門兮布揚芬於
漢闕將逆施於末路兮終雪恥於前哲斯時也雖

具邇其舍情矧駕言以遠別遵首路之逶遲兮睇
蕭晨之悽緊憑江閣之交疏兮見中洲之帆影淮
水落而彭城荒燕雲飛而冀門近想天上之仙班
恍夢中之幻境粲西咲而心搖託南樓而跡警追
二陸於疇昔兮緬兩到之徂征置美酒以高會兮
列祖讌於華楹徵綺羅之妙舞兮被絲竹以新聲
懼堂中之蠟燼恣戶外之驪鳴雖擬跡而同別亦
原悲而異情憤世道之黹黯兮請以余爲殷監衆
女嫉茲蛾眉兮均自沉於明艷客方誠乎用光兮
嵇弗戢而罹患雲賦就而晚疲賈書上而早譴齒

何貴而象焚鞞乃災於豹變庶養德於木鷄毋虎
才於能鷹辟涉海而獲濟兮諳風波之苦辛傷虎
口而幸脫兮猶心悸而告人疢已痼而復初兮舉
藥石以具陳羽有落於虛彈兮咎無蹈於震隣紛
余季之玉秀兮又襲之以蘭芳振逸響於寥漢兮
赫揆藻於明光恩被命而攸渥兮德潤身而彌彰
渺岐分於川岳兮瞥星散於參商季昔時兮送余
余今日兮送子若迭代於天運匪徃復於人事喜
何劇而無悲悲何窮而無喜情生文以敘離詞因
情而歛思腸屢絕於停毫泣欲盡而盈紙願行者

其勉旃惋居者之已矣

弔言子祠賦

循故祀以延盼兮儼初地之猶存風蕭蕭而塵默
兮日慘慘而霧昏但見荒榛蔓草斷礎頽垣狐鼠
夕走烏雀晨喧並咨嗟於行道每逕迴而過門若
夫四禪經始二梵肇基旣流銀以儼殿亦布金而
城坻力窮土木之麗工竭雕鏤之奇疏寮綺綴櫺
栱丹施觀莊嚴而恐怖示寂滅於慈悲由是息心
之侶仰止銷跡之衆皈依研經味品擁錫蒙緇信
毗邪之勝境而迦葉之宏規者也詎知道有隆替

業有興亾恒河瀉於金谷祇園表爲戟閣鴿散林
遠之舍燕巢王謝之堂寢唄響於鐘磬奏艷曲於
笙簧誰其慨歎良二千石侵者八九餘者十一乃
建學道之宮爰邃精華之室禋祀言公肅瞻像飾
斯文在茲嘉名允錫絳帳霞披青衿雲集洙泗翔
風絃歌振邑教思無窮胡侯之澤迺有中丞因之
開府鈴閣崇威旌門耀武衛士操戈縣令負弩內
有靖柝之廬外設嚴更之署一旦市兒弄兵博徒
構釁崑燎方揚驪灰倏燼遺簪履於東墻弛肩鑰
於北闔民之無良德則不競森栢將雙樹俱凋其

露與稜霜共盡烏統枝而倦棲馬號塔而却引嗟
乎經云火宅律曰化城浩舛靡爽幻理有徵胡然
而釋胡然而儒胡然而堂胡然而墟法淪於空孽
懼其害測平陂於前因垂傾覆於後誠

男楸謹校

皇甫司勳集卷之一

皇甫司勳集卷之二

吳郡 皇甫沆子循 撰

四言騷體十首

相彼古泉 贈吳公也

相彼古泉湜湜其清君子汲之顯允王明曰旣受
福群小是愠肅肅嘉征彌邵彌濬我山兩峙泉侯
深矣懿彼泉源胡自今矣之子有懷慨其臨矣
泉之混混睇彼高岡伊誰命之我思隴鄉于以瑩
心亦異之覲于以逮下亦孔之厚茲其方可胡鞠
馬疲

民之繹思侯泉浩幽彼其之子莫匪令猷不瑕自
天裒澤方州

相彼古泉六章三章章四句三章章六句

滴彼上善 賦也君子濱於水南遡洄而從
者賦焉

滴彼上善滙厥靈長滔滔其逝在河之陽彼美人
兮于馬遨翔

滴彼上善滙厥漣漪滔滔其逝在離之湄彼君子
兮于馬委蛇

滴彼上善二章章六句

歷田歌題張兵憲卷

我所思兮在歷山山聞寂兮水潺湲徂畛學稼慕
有鰥希世謝茲桑者閑龍翔鳳舉鷓鷯班深山鹿
豕安可攀承麾東邁齊魯間側身西望阻蒲關欲
往從之虞坂艱悵隔歲兮草空綠渺佳期兮桂屢
丹美人貽我明月環思公子兮何時還大隱在朝
不在野田園荒蕪何爲懷憂摧心顏

夜泊魯橋胡中丞馳翰至披襟起坐秉燭讀
之颯颯樂章聲中金石口占奉謝

見君晴別君雨人向巫陽去

別君雲作雨思君月出雲疑是湘江上猿啼不可聞

河水瀰瀰獲此雙鯉贈比琅玕報匪瓊玖

夜中不能寐起坐理金聲山月為我明河水為我清思君不見那為情

題施比部四號詩

茗水滙兮雪水長美人容與兮在中央翠竿嫋嫋思得璜藏以巾笥貢明堂烹鮮守鮒兮屯以康功成網弛兮筌盡忘從任公兮憺方羊右茗雪漁長窪尊兮玄鬯玉瓚兮黃流羌器用兮各有適行潦

之水可以羞美人既醉朱顏柔身後榮名焉足求屈平獨醒兮衆方忌善乎劉生之沉飲兮細萬物

以輕世右窪尊醉客

峴山高兮茗水深陟窈窕兮眺嶇嶇朝騁駕兮東麓夕弭節兮西岑啓玉齒兮坐芳林橫鐵笛兮吹

龍吟洪濤震兮玄雲陰參差管籥難為音右峴山鍊笛

桂為楫兮蘭為舟揚擢歌兮凌中流滄波興兮碧雲合佳人不來兮心夷猶溟溟商川待汝濟迢迢

天漢從君遊攬春芳兮屢歌眇秋水兮含愁右碧浪蘭舟

春江詞贈諸比部

越鄉兮深處姚江兮攸注將考築於盤渦遂逸釣
於幽渚春日兮載陽桂楫兮蘭槳泛中流兮容與
榜人歌兮慨慷攬物華之駘蕩鑒水德之靈長朝
騁鷺兮天姥夕弭節兮雷門臨禹穴以探秘邈耶
溪而討源起渭濱兮捐吾土濟商川兮排帝闕
滄波悵公子芳草憶王孫春來脉脉江注悠悠河
清不可俟胡爲久淹留羌銘功於石室終畢願乎
丹丘

蠢爾海氓一首贈中丞平寇也中丞孰謂謂

夏公邦謨也

蠢爾海氓憑險構患聚徒寔繁颺起滋蔓法網凝
脂因緣反汗伊誰之愆階之爲亂亂旣不逞歲亦
荐飢脫耒爲挺裂裳爲旗焚廬揭篋沉艎奪輸盤
汚窟據消泐魁棲鯨氣方煽羽檄來聞皇赫斯怒
廼命中丞秉鉞之帥執憲之隣司疆之彥扞圉之
英寵靈是藉嘉謀僉同顯允元老時維夏公建牙
賈勇開府臨戎在帷運算對俎折衝肅肅中丞申
命有赫革政以仁授師以律厥角先崩回面內逸
一鼓作氣曾不終日於廓青海丹艦宵濟止必鳴

桴動必舉旒天吳効順雲祲斂翳渠醜斯獲脅從
罔治佳兵載戢爰居載寧商無弛市農無輟耕旋
凱奏膚于周之京皇心旣憚慶賞攸行桓桓中丞
致天之屆德威溥將神風潛駭共帝波臣易我鱗
介化衍遐圻聲流海外 皇眷東顧視民如傷中
丞法令皎如秋霜治絲去琴更絃解張若降時雨
若熙春陽鉗徒殊劉甲士振旅燕樂承休式歌且
舞稽首萬年受天之祐小子作頌嗣美吉甫

送憲使蔡公督晉學政十二解

維揚肇域泰伯始都因江爲浸藪曰具區列國秦

并置郡首蘇海凌壯麗眇睨膏腴其劇矣茲邦艱
哉惟守漢簡二千虞稽三九績以政成官由德懋
寵以緹輜華以章綬其桓桓蔡侯產自昂精誕嶽
之秀挺國之楨爲民司牧與士作程南叅馮翊東
寄專城其勸課農桑發摘姦宄被以仁風臻于化
理河內同聲潁川共美匪直望舒逮及朞已其暫
去留思再來快覩弦誦于家菽粟萬戶爭勞以迎
式歌且舞嗟爾群黎咸侯昔撫其載遷楚憲俾飭
吳戎郵無傳箭幕有懸弓折衝俎上制算帷中娛
枰謝傳緩帶羊公其奚奪之吳遄臻于晉戢武崇

文叙倫興行甫憲斯兼契敷在敬下民疇援 天
子有命其七鍾姚哲吏韋白詞流懷貞隨邵砥節方
攸瞠乎後躅邁種前修恩隆父母令讐君侯其八今
之士子咸詭於藝或失則浮或失則靡通聞其微
瑄揚其旨侯執厥中務納於軌其九今之使者怙勢
作威民不見德惟辟是賂罹以密網構以厲階公
聽惟平和易以綏其十遐攬堯墟顧瞻舜澤迭紹迭
興復禹之跡水遡汾漳山探姑射考俗辨疆典學
之職其十一奕奕蔡侯秉粹履醇允文允武惟清惟
寅志舉三代用弼 一人鼎鉉鴻烈社稷蓋臣司

勲作頌耀世弗湮其十二

贈周侍御

東南之美產於會稽竹箭有筠珪璋與齊其一爰挺
霜稜來耀法星洪濤允哉瀚海底寧其二辟彼巨川
用汝作楫亦曰砥柱中流是揭其三帝闈雖渺
宸聽實卑封章朝抗 聖慮夕移其四軍旅妨農早
魁為虐民乃游飢賜租蒙澤其五殿中簪筆都下埋
輪貴戚歛手威懾披鱗其六既稱臣直亦昭 主聖
元氣以調壽國之命其七奉揚 天憲出納王言紀
綱攸賴朝廷以尊其八文武周君為古柱史五教敬

數譽髦多士九三吳振德稽首興歌小子作頌刊

石弗磨十

嘉靖己丑至丙寅作見政學還山集

男琳謹校

皇甫司勳集卷之二

皇甫司勳集卷之三

吳郡 皇甫汙子循 撰

五言古詩二十六首

議獄詩

敘曰臣汙始第觀政廷尉右署日取古刑書繹之以究夫君子盡心焉者繹而有所感輒發為詩爰得二十六篇紀之名曰議獄云

或曰獄可議乎曰可疇克議之曰士師克議之然則作是詩者奈何夫詩非議夫今之獄也議夫古以諷今焉爾君子謂是詩也與政通矣

洪鈞宰玄化大塊敷至仁哲王播燹憲顓蒙葆和
真淳風無世下明德有時湮折民紹虞典儆位麗
湯刑堯服詎可象姬臬聊具陳斯功匪徒懋休命
隆所遵

昊天運休命哲王繹玄理春生有載陽秋殺無停
晷大坊嗟久踰湛恩難獨恃豈不戒焚絲奈此回
溢水獄吏苟盈門圉豕遂成市擔摺熾章程奇請
繁法比明允願時忱遏揚躋世美

士師昉自昔建官表惟能周方位司寇秦亦置廷
平夏謨紀大理漢景崇今名正監列羣辟勾檢革

咸寧御世若御勒佐王詰茲民

惟天齊于民含靈在寰宇流矢悲影風忍與金石
伍網密或易罹文深翻見舞疑脂已為踈刺爇末
云苦奔馬匪善馳我索先自腐

天王位正月飭吏布祥刑昭如日星鑒浩若江河
行軌迹既夷易辭驗亦平亭執秩遂為讐僕區終
自傾玉條有三尺金科無十程懸衡乃國法在鼎
非吾民

協民本中則折獄尚慈良稽古列嘉師利見休無
疆聖化孚九服帝德光四方頽風距澆季俗吏等

尋常衛顛惜懸命博士奏施行臯陶惟邁種千載
揚芬芳

末路速多訟民生滋不辰菲履豈徒象赭衣應勿
純誰謂九人壑勝彼一人巾史遷懋文學鬻拳濟
忠欽嗟哉方下吏司鳴遂無晨潔身寶琬琰慎俾
就煨塵

南睢重骨立太甲本思庸孟明豈不念秦穆霸西
戎井田與封建赫赫垂鎬豐唐明失懿矩効此肉
刑同安得緹縈氏千載鼓芳風應有鷄鳴調垂仁
漢牘中

從橋犯玉輅入廟竊珍環釋之自守法抗節為
反匪無尚方劍三尺授奚詭張湯視意旨何啻鸞
與鷓矯矯安陵栢異代同勉旃

嗣君遘陽九艷妻煽方處商辛慘炮烙曠世繩其
武丕丕李唐祚不絕亦如縷火原伊向邇持平藉
徐社區區麟趾格何以飭斯蠱

酬知儷白壁聽訟得黃金豈不黷爾賄道邇理可
諶古人戒威富象齒能毀身何以讞天子惟有至
公心

奇衰效噐訟律案日以繁遂逮見知法復啓告密

門大臣不釋滯主者胡守文君子高五聽臚情或
見原匪貴發摘神要使民無寃

設網本爲魚冥冥鴻罹之刑以威小人君子亦嬰
徽膏火徒自煎蘭芳有時萎隆隆翻見絕皎皎易
成緇蒙莊戒崇頰願處才不才鄒生下梁獄三嘆
攄幽辭

青災願惟恤泣罪矜不讐迨德睽明慎疑科肆虔
劉躡貴履自賤崇朝聞燠休列星爛若數逸軫惜
方適遺亡及三宥孔邇起宗周

古人重向隅何以久坐石安得秦庭中而乃無夜

泣苦此秋荼繁畏彼夏日赫三刺不及訊兩造未
遑繹宣公寶明恕相將止刑辟

機辟徇多變畢弋列重圍終朝不及掩誰謂烏無
知前方增擊去後已搶掄飛聞幽良殺草懲纖應
棄灰我行石阜中下懸千仞谿豈憚行者苦要俾
犯者稀

服駑不若驢藝禾在去秕腴腴原田中無使滋蔓
起文情及武赦管仲推其理君恩自照微偏枯非
令美大賂重南金願遇陶朱子

偶語蒙極刑妖言著爲令殺人如薙草我生謂有

命區區鄉校情防川導其性鳶卵無毀傷鳳儀德
斯盛

文皇軫民瘼愴念明堂圖遂令五覆奏獄豻有完
膚漢庭致刑措縱囚風不殊後方殘刑逞謂鵲安
巢乎

法令惜滋章刑書遠啓明崎嶇難自列川險本人
情哲王允欽恤君子利艱貞盜金匪鄰子時亦致
山鳴

明條在議故茂典亦原親法行自近始安得庇茲
人居方陪華屋出乃列朱輪朝等盤石固暮為屠

戮身鴻恩本浩蕩觸德甘主臣

寬身以無仁報怨寧有德匹婦襲不忘何況武夫
力矢勿共戴天安肯同中國先王以民成乃謹調
人職書之未可訓推刃豈遑息春秋大九世臥薪
甘膽食

大夫刑弗上北面聊寵珍一德豈不麗四維良可
敦造室引自裁徒官非等論盤水無劔辱朝堂有
杖寃死灰未及焰獄吏從此尊吁嗟洛陽淚漢文
猶寡恩

鱗運各有適後天奉玄理表正謹三微求端戒五

始物肅不可羸道成良自此徹縣日勿舉王者本
重死昭昭象魏間安得干其紀

春秋旨數千裁自聖人心善善豈不懷惡惡良獨
深欲蓋罪彌彰辭繁法以森誰當折漢獄淑問宣
至今

嘉靖己丑作見政學集

男琳謹校

皇甫司勳集卷之三

皇甫司勳集卷之四

吳郡 皇甫汈子循 撰

五言古詩一十八首

送楊子祐知興國

尋役謝皇畿遄征辭帝闕朱明垂方隆脩景迎未
歇晨旌抗欲徂午馬哮不發且覆天末觴暫緩星
前轍攄情諒子衷執手信我說不休蒙嘉運利用
賓時拈彈冠捐族間縹組躋朝列玄士守深湛謁
帝生激烈稽首金馬榮澡身玉壺潔平江波濤興
昊穹垢氣結一麾竟出守三命聊所竊行行邁楚

荆漭漭遵吳浙旆指衡服雲帆掛湘干月遐想百
代雄浩嘆一時沒願葆幽谷資母俾蘭芳滅炯介
投處言慷慨起長別袂連汗金揮心與飈俱熱洞
庭秋水清擊子中流楫

甘泉先生宴別席上賦三首

天王肇郊儀宗伯不皇暇隆禮樂殷周躋世登虞
夏忽半冬簷規爰返春曹駕進我青衿士坐之絳
帳下無譁啓初筵有與振餘學豈徒良宴會眷此
遠行者奉義各于邁黷權亦聊且顧愴留滯身側
想寅恭化

愚也逢樞士少嗜綴文辭柔翰弄綃縠懿矩躡墳
筮旁覽周秦典三復齊梁詩榮華旣已隱喫詬竟
何施廼慕夫子學母俾後辰迷授我合一編啓我
深湛思循循兩言誘卓哉百世師呼寐成然覺道
腴良在茲

晤言聊一室尋役頓千里緬遘梁木仰况謝蓬蔕
起擊筑興長謠臨觴熱雙耳匪嗟行路難寔感年
華駛樹勲幸及時息學恐虛此無由慰孔說何以
徵孟喜金腹戒遐心瓊枝葆令美作頌幾永懷敢
告同門子

春日書抱東當道諸君子二首

鱗次歲方獻駘蕩化攸同凍樹荷靈曜潛穎熙朝
融乘木政且平升階澤斯豐奉三超神理吹萬等
玄功既漸八埏外復被九垓中泰來有疇祉時往
無再逢牽世詎嬰網司晨猶在籠效知匪患位處
才俾休躬誰謂一羽弱颺之戾層空懼貽搶揄笑
願託扶搖風

璿機幹迴運寶曆啟東節載陽薄曾暉改陰謝凝
結條風行遐圻飛澤振窮穴昔感百卉腓今覩羣
芳悅皇仁美無遺物化滋未歇恫予秉國楨利賓

晞朝列命邑奚獨愆愬闈良自拙天高赤墀塗雲
暗黃金闕區區誰見知怛怛難具說所藉揚末光
終然照孱劣

送袁永之戍越

晨風戒商序佇立野蕭條念茲帝京別軌路脩且
遙遙子何之將予情內勞在昔蒙嘉運與子廁
王僚媿匪通時拮而俾世網遭人事若浮雲聚散
仍一朝子勤越鄉戍予掌畿輔徭行當慎舟楫平
江有波濤吳越古戰場故鬼日夜號子其感興廢
毋用徒怵怵

出京鄭張王三子觴予祠亭作四首

良時不易遇散吏竟難容稽首辭帝闕出自都門
東都門倏萬里雲霧迷九重睠茲同心友結駟遠
相從從予感行邁置酒賢指宮旭日麗臯薄廻飈
振林堦蘭芷猶未歇菘菜亦已茸淚為岐路滋志
兼物化恫臨流復徙倚聊以寫情衷

憐君昔抱病甘此武夷臥寧期時網牽復在金門
步命駕輕千里傾蓋在一顧金匪希世姿遂與驚
年暮天道邈難謀人事艱多選緬然異得喪已矣
各去住聚既同朝雲散亦等晨霧幸有盈尊酒網

繆抒情愫行予身實遠願子心相故

謂鄭憲

昔與君交者乃自吳趨見一朝越江潯千里返燕
甸謁帝承明廬伊予蒙嘉薦已傾金叢心復接瓊
枝面憂或枉惠勞樂亦同酣宴投分踰三載恩愛
兩無變寧期謝朝寺重與異鄉縣臨觴心若焚把
袂淚如霰努力崇令德母謂名可賤

謂張詩

義心輕遠別相送勞密親密親等肉骨倏若商與
參置酒臨河梁飲馬越城闈城闈睇黃屋樓觀杳
清旻崇高望弗及疎遠難為陳桑梓懷故墟軒冕
絆我身歲月復行役山川多苦辛凜秋換物色首

路愴風塵淚下不可揮日暮沾人巾

謂日俞

過武城謁言子祠作

朔風枉輕帆戴星理扁櫂超忽之武城有蕩瞻魯
道古邑一何卑令猷久彌劭弦歌謝清響精華契
深造曰余廁文儒耽寂遠時好剖符辭帝京腰章
宰名趙諒乏操刀資懼貽製錦誚經過緬遐躡神
對宣幽抱言采江上蘩薦此廟中貌誰謂殊千載
可以同高調

經始浩歌亭

希世無妍姿守道有睽愆上書謝巖邑移署賁文

園多士日在門聖猷邈相宣夙心亦云已時好良
不然再麾宰畿甸驅役赴漳川昔感玄陰徂今睠
朱明旋亭宇粲崇構桃李紛廣阡偃息寡民務迂
拙聊自便密邇被王化幸與樂豐年河陽匪殊調
單父庶茲茲

秋日詠懷

緬昔承嘉惠來斯歲方朞虛薄宰民社周爰歷皇
圻簿牒苦相迫化理猶未綏幽亭有遐託晏坐俾
心夷惟時值蕭序孤英被芳畦窓岫列紫峯滄水
夾綠池陶生稱達士王令乃仙姿飛舄謝當路反

服歸東菑

自中山別陳子良會之無極作

閉戶理案牘尊酒日慇懃出郊覽物色桃李花纈
紛游子感行役因君念離羣况起嚶鳴鳥悵然不
可聞回首中山道傷心隔暮雲

登挂劍臺

臺在張秋東有徐君墓
草似劍形能治心疾云

徐君美初覲季子意方敦上國游纔返斯人痛不
存脫劍帶嘉樹揮涕向高原携手無由贈馳目遂
為愆寸心良自許千金寧足論徒聞化靈草憂來
欲代萱

胥江汎月旋舸登城歸詠

江寒湛澄澈華月輝相鮮乘流載尊俎瀉影發樓
船翠巘合杳靄蘭臯帶長煙萬艘雜燈火千門紛
管絃飛蓋攬崇堞輟棹迴前川曾經故宮裏為照
荒臺邊情非鳥棲夜跡是鹿游年登高與臨水行
樂併悽然

黃州郡齋作

少年不知諱摠衷懷謬在宥蒙至仁承嘉譴猶
薄負外置為理齋中但掩閣輟藻事刑書懸蒲代
敲朴株染得自明逮者盡釋縛雖乏廣漢神庶幾

仲由諾兩聞春鳥鳴再見秋英落笑悟孺子歌間
從漁父謔采蘭貽所思無媒將焉託投賦弔湘纍
長揖返丘壑

嘉靖己丑庚寅辛卯壬辰癸巳甲午乙未
丙申丁酉戊戌己亥作見政學浩歌奉使

寓黃集

男琳謹校

皇甫司勳集卷之四

皇甫司勳集卷之五

吳郡 皇甫汸子循 撰

五言古詩二十首

春夜遊西園同諸兄弟作

佳節值瑤燈清夜遊金谷良友披蘭襟懿親儷芳
躅經過敞榭邊徙倚寒塘曲遵渚雖近尋翫峯生
遐矚軒冕幸暫違簿領謝羈束跡非三逕荒情是
一丘足鏡裏髮始華尊中酒初綠及時不爲歡坐
遣春光促

奉荅子安兄

江郭改故陰家園藹新霽柔條始發林芳草漸紆
砌潘居信為閒揚亭况重閉曰余忝明時與子承
嘉惠分省各有讐佐郡慙所蒞暫就北山招轉愜
東田稅情忘桃李言跡豈匏瓜繫感遇興長謠來
章緬幽契

春日遊西山作

吳鄉信云美山水饒嘉麗疊巘表參差層巒隱虧
蔽時惟二月芳雨散千門霽蕙畹蕩雲滋蘭臯屏
氛翳獨携丘中琴言鼓江上柺結友遵巖阿尋僧
指林際仰看衆鳥翔俛悅儵魚逝物理相因依余

蹤且畱滯

夏日來鳳亭小集各賦

首夏猶芳月終宴就薰風泛觴蘭水上置座竹林
中飛花代舞似鳴鳥當歌同笑將愁暫破醉遺累
俱空更待西園景畱賞北山叢

寄懷王道思三首

媵行每招愆榮名乃為累弱冠懷夙齡登廟成華
器寧知洛陽才祇取漢庭忌願因天際歸及此河
干伺

忽散遊梁客來作過吳人朝發胥江汭夕濟蠡湖

津還山一何迅行路多苦辛臨水欲相送停雲庶
可因

本乏晞世姿翻為逢時誤良友豈不懷遄征詎遑
顧日暮勞所思凌風未成晤將從夢寐求緬邈山
川路

陸士衡墓

平原秉秀質吳趨蔚清芬邁德自軒裔夙齡非世
羣珪璋既特達華萼復輝紛運謝金陵氣銘晞石
室勲砥節在繩祖奉義乃從軍寧知懷慷慨從茲
嬰垢氛旗掩朝歌月劒起夜臺雲李廣忌為將楊

雄耻綴文鹿苑成單露狐丘迷曠芸吁嗟千載鶴

何處一來聞

晉書機始臨戎而牙旗折
意甚惡之鹿苑機敗軍處

秋夜把酒對月

宋生陳九辨陸機歌百年悵茲清秋日聊使幽懷
宣矯矯歸雲鴈嘒嘒含風蟬摧芳委朝露俄景流
夕川鱗運有代謝薜榮無常妍始知行樂貴何用
居情牽長夜思秉燭新月正登筵金尊泛綠醕寶
瑟絙朱絃商歌當棗下楚舞出花前餘名焉足藉
達生乃為賢

仲秋之月諸暑燕私風月雖佳雲雨或間五

首

奉義遊京邑數載違親宴迢迢明月光照我越江
漢何如故鄉夜及此清秋翫鏡彩攬未盈璧景委
纔半桂樹敷丹英華萼紛相煥雖謝西園棕庶附
南枝翰十三夜

良辰信具美清夜永爲歡明月已幾望華彩流雲
端廣庭置芳座高會列盤餐但云杯行緩不惜露
下寒情來感今易跡往戀昔難一聞關山曲猶似
別長安十四夜

敦賞每卜夜行樂聊及時秉燭且不寐待月豈云

罷鱗鱗玉葉薄皦皦金波遲高臺臨窈窕廻塘生
漣漪載歌蟋蟀唱復詠鵲鴿詩清輝一以鑒素心
同所期十五夜

嘉月有餘照歡晤無限情寵弟載旨酒要我坐華
楹冀齊茨復委桂蒲輪乍傾忽忽愁霖至瀏瀏悲
風鳴圓缺遙相運明晦焉足驚太康靖往訓知止
崇令名十六夜

肅肅歛朝雲娟娟收夕霧江上珠始來天際鏡方
露列宿齊掩縹凝霜共呈素嘉肴尚堪薦美酒猶
足具良友且無歸劇飲彌茲遇所願揚末光何辭

照遲莫 十七夜

秋宵鬪子安兄作

清夜遊家園眷言懷丘壑素月升圓靈千里共寥廓始出東南樓俄頃西北郭華燭滅蘭堂金波蕩羅幙雖過二八時光彩紛綽約商歌正流響魯酒亦未薄人生貴適意胡爲坐羈縛結髮從至今朱顏悵非昨冶服豈常翫榮名焉足託良會聊具陳麗藻復間作穆如揚清風粲若敷春萼申章忝惠連何以獻康樂

東吳吏部純叔

冉冉清秋末戚戚幽懷始借問所懷誰翩翩佳公子從告返家園薄言戀桑梓豈乏晞世符緬契齊物旨嬰情匪軒服委志在文史馳翰揚英芬敷藻爛成綺爲道日方損修能時見忌屢偃東郭扉果愜南山屺酒德叅浮萍琴心間流水迴颺謝罍塵何能渝令美

秋日往梅林莊居

疏公守舊業班生慕常廬薄遊千里外一出十載餘偶與密親邇怒焉懷所居東林扉尚偃北郭逕始除青山藹盈戶綠水湛通渠流盼悉成往眷言

思遂初將從古人學乞歸事畊畝顧驚年跡垂坐
使情興紆

奉荅子安兄歲暮見貽

在昔叅英寮俱承明主顧被服紛妍姿影纓儷芳
步悲哉遊子情徒以潛郎故一為衝飈激遂使佳
期誤入魏悵無奇浮湘眷有慕揚旌指敝廬千里
同歸路再聞蟋蟀唱兩見兼葭露耀靈本易傾馳
運豈難度端居懷苦心苦心誰與晤但感時不然
何嗟歲云暮

冬日往虞山作

故鄉誰不懷名山矧余慕一為塵跡牽遂闊賞心
晤偶值芳歲闌遙泛滄洲趣澄江帶餘霞丹壑收
殘霧嚴霜委野草寒飈振臯樹指途尋舊蹤流盼
成新寓魚樂媿淵沉鴻冥羨雲鷺歸來徒是今履
往悵非素

贈范子

在昔紀高士遐哉舉逸民始知弓旌代廼有巖壑
人范子秉茲尚非病自云貧結廬靈山曲垂竿胥
水濱緒年習道論遊方狎隱淪披裘忽過夏采藥
已載春雨漂庭下麥風落甑中塵為頌幽貞吉庶

宣皇化淳

嘉靖庚子辛丑壬寅家居作見安雅集

男琳謹校

皇甫司勳集卷之五

皇甫司勳集卷之六

吳郡

皇甫汸

撰

五言古詩二十首

初發京口

少年慕攀鱗千里輕徒步媿匪登廟姿亦謬臨軒
顧朝躋赤墀塗夕騁青門路寧知世網嬰遂爲儒
冠誤昨浮湘江還願守箕山臥不勝戰者勞心跡
兩垂忤解纜指廣陵眷戀未能渡興歌矚流波庶
幾照情素

贈黃子先皇甫氏也因避地隱姓云

范睢入秦庭梅福游吳市隱姓干相君逃名類僊
吏客逢江夏生自謂西州喬叔運遭崩亂遠跡甘
留滯家本秦川人身從越鄉寄披霧清明朝利見
飛龍位論難登石渠煙煨吐經笥述德誕吾宗
美光適世金載發江都方舟涉淮泗聊宣敦賞情
一慰羈離思

桃源遇風追子安兄舟不及

千祿非夙心行役苦相迫仗策隨平原揚舲共羈
客空水闊桃花深山眺桐栢終風暴且來奔湍溯
方逆臨津引不前天際孤帆隔馳情東望時何異

西陵夕停橈既無棕對酒亦未憚眷眷勞歌興戚
戚煩憂積

張水部招登戊巳山兼覽徐武功所撰河功
碑

劉向蒞都水張騫窮河源哲人播嘉績上善廻狂
奔土阜等刻苑延眺曠周爰魯道蕩遺軌蒙山隱
華軒化因子奇著信以季札敦武功吾鄉彥烈烈
豐碑存辛勤宣防事慷慨昏墊言之子守畫一何
異雙璵璠往跡隨清泚興情寄綠尊

天界寺贈半峯上人

顧省紛俗嬰尋山愜幽趣秋水淨金河寒雲翳珠
樹了看花落時莫辨鳥還處休公別來詩江生擬
將賦

雨過高座寺

積雨黯花丘綠雲入香界修策振林間踈鐘落峯
外康樂誦阿含陳思演清唄欲除常戀牽惟是逃
虛快

奉謝王司馭惠方

與君闕下逢恍記壺中別高駕凌雲煙芳姿若冰
雪狂走衆方驚心醉自相悅安知問馬言獨守養

鷄說金丹何日成瑤草終歲掇倘承清燕餘無輕
鴻寶訣

雪日寄王戶曹湖上官舍

初雪度江城殘雲來省閣覽物嗟歲殫懷人悵居
索擇木本同棲傾枝猶異託維舟安可從開尊自
成酌

同蔡中郎過王貞外宅懷子安兄

委巷駐高車清溪夾幽宅細雨急逝年凝燈照寒
夕依同南樹情飛異西陵跡爲假雲中翰一寄天
台客

往視城南別業

夙齡不事產落魄懷英風抗志雲霄外絕戀蓬蒿
中避世豈在遠漢廷聊見容未識山川險安知途
路窮兩自違京輦久欲返臨邛疏公有遺業精舍
開墻東命策值蕭序覽物感情悰逕密多陳莽林
荒非故叢昔往候門稚今歸成塞翁鳴蜩若騰笑
馴麕儼相從搏飛乏高翼何爲苦微躬吾廬倘可
適稅駕幸來同

奉和子安春日軒中讀丹經之作

徵君抱沉痾平子起憂端測化芳春日歎逝清河

瀾同心開寶帙託慕在金丹將從滄霞似共舉乘
雲翰寓言不可究玄理何能殫探崖石髓秘采嶽
玉芝殘朝嗟祇用老暮笑且爲歡綠尊命高酌朱
弦被雅彈但遣物累盡豈辭人益難頽齡勿謂促
達生庶自寬

余棲病經年刀圭未效季弟示我以沙門之
偈伯兄廣我以大道之篇伏枕奉鬻并用逐

瘧云爾

本懷蒲柳資兼落風塵穿顧影蛇屢驚看心猿靡定
憂生苦多戚好道晚彌甚浮淮喪其珠還藥未有

鏡晨誦披雙玄夕覽流三乘親親敦友于各各惠
嘉訊空詮寄深藻妙理發高詠因君念處才無令
伐真性

子約北歸對酒奉荅

三載遊京輦一朝旋故疆豈不眷華省惻愴在帷
堂未習舟塗險安知軌路長宵征無淹泊晨發懷
不遑辭燕獻芳歲踰楚變青陽入門問家難奚止
庭逕荒置酒相慰勞臨食增慨慷已謝子輿樂徒
緬孝標傷諒乏緩齡藥胡取駐顏漿風河有至誠
雲壑且高翔

四月仙誕日友人昆弟集我蕭齋琴酒間作
有倡斯和

桃核訪初辰蓬山竚靈跡命駕紛行游披帷猶屏
息敦余值二難結客枉三益兩館霽餘清雲軒坐
生白丘琴發雅彈鄰酒瀉芳液冷然御鯤響恍若
驟鸞翼吾意眷山水何事餌金石方達無生旨安
知有生懌

端午邀過叟以視藥不至

天中紀令辰塵外遲嘉客將同嵇阮懔未枉求羊
跡側聞採三秀獨坐煉五石犬護青泥函蛾飛白

雲室丹玄豈易成髓凝何由食不如持美酒酣飲
恣所適緬余遺絲繒期君報金粒

送沈二仲文游浙中因寄田叔禾

昔與田叔別乃自漢東都英髦值嘉運晞冀荷天
衢軒纓無榮戀竹帛有良圖玄疲子雲草書削路
生蒲搗旃辭京輦紆駕領藩符響臻傾四座焱散
各一隅冉冉流歲月駢駢奉馳驅時違事既異跡
舛情復殊冶容嫉衆女姱行唾淺夫敬通方見抵
仲翔亦被誣杜門著越絕倚市歌吳趨願因晨風
想共保朝露軀之子羨黃鵠西飛訪白駒氣合雙

神劍光儷兩明珠雄談秋水至藻思春葩敷虹霓
遲心賞山水焉足娛申緘緬忽闊撫已媿槍榆

秋日寺眺

西錫混縉流南冠類囚客昨戾青陽徂今來素秋
迫炎序俄戒涼華滋互凋實前因感六迷後果證
三惑欲消塵世牽聊晦空山跡夙夜緬畏行明朝
露方白

盛二仲交示廣志賦因贈

江左本多奇盛生稱獨秀速化有性靈棲玄謝塵
垢披帙十行俱擁衾萬言就揖手青門東醉心在

良覲廣志擬彫虫織書臻古籀情同呼霓餘興是
凌雲後媿匪辨璧資相邀出金奏

雨懷盛二時在清聽齋中

支齋營八關陶情緬三逕嗟我裘羊徒悵此琴尊
興室邇心獨遐城嚴跡難并卮言誰與談籥理自
相證細雨忽戒寒輕霏坐生暝天風迴海潮秋聲
送清聽

璇上人院菊

灼彼東籬花眷茲西土見青蓮同淨姿金粟等明
舊色曾象王供香堪鹿女薦何異休公枝一令鮑

生羨榮悴各有因開落互相禪我本解宦人歸

胡能遣

鮑明遠集有休上人
贈菊云玳枝兮金英

嘉靖癸卯甲辰乙巳丙午丁未戊申巳酉

庚戌作見家居南都禪棲集 男琳謹校

皇甫司勳集卷之六

皇甫司勳集卷之七

吳郡 皇甫沆子循 撰

五言古詩一十六首

補官澶州行經曲梁作

弱冠陟明廬腰章宰芳甸方齒蒞阿奇晞聲治單
賤媿乏操刀長懼遺製錦譴桐絃坐屢鳴桃花歷
三見北闕忝嘉招東省參羣彥牽世值衝飈徂年
倏奔電驅駕邁新邦褰帷經故縣悲哉丘隴非悵
矣閭井變猶煩父老迎爭識使君面德汝匪惠心
式歌詎成排

始至澶州作

自我謝郎曹竭來守吏局塌翼懷奮飛低眉就羈
束驅役遵施丘興歌聊淇澳愧乏沂海謠何以佐
明牧幸寡宣城辭間可理尺牘升既等陵喬沉亦
悟陂復茅草合江程清猿竚旋轂衛水日東流因
之鑒心曲

廣平郡觀蓮寄翁守舊南比部郎

留京白雲司原廟青山路眷此湖上芳期之省中
顧饑承畿輔麾遂抗邯鄲步遶郭帶澄溪朱華湛
秋露燕寢晝亦閒襦歌夜安作徒爾奉清香無由

展良晤

移官越中初返家園奉荅伯兄虞山見寄

薄遊逗京邑獨往眷長林始奉越鄉役因愜故山
尋曠茲二載別良晤展斯今誰謂百里間猶自邈
徽音未結丘中賞先枉池上吟睇燕悲稍戢懷荆
嘒以深花源迴俗轍蘿逕斷塵簪且駐稽東駕雲
扉期此心

役行至橋李值親故作

放舟窮越水息駕見吳山山近殊易即室遠竟難
攀徒以大夫守悵茲遊子顏密親載尊酒晤面語

鄉關歎逝歲不待思存淚已潛春來芳草際
白雲間無勞猿獻誚會見鴻飛還

于役吳鄉值伯兄下第來集

余來自越郡君至由燕京解裘洛塵積對酒鄉思
生爲語比征事猶多西吟情紫塞方傳箭潢池復
弄兵受釐在宣室遣使出蓬瀛上書或不御投筆
竟誰成防秋胡騎入何日海波平年已非軒冕志
豈眷綵纓願守箕顛節還就河陽耕聞斯倚增歎
從此欲遺榮

謁劉文成祠

璿機旣舛運寶鼎亦乖移推辯穢玉藻左衽黷絳
衣謾呂憤后耻誚田懟宰嗤猾夏蕩無象誕聖鬱
有期陽九值傾否明兩邁重離俟清乃堯涓顯允
聿興姬探符洞赤伏懷韜臥青溪居擬王佐匹起
爲帝者師羣策參多士獨算莫與偕禹志晚晞帛
良謨日陳帷立談不解褐肆伐竟承麾么麼井蛙
器妄干神龍姿一舉已就殄崇朝遂于夷摧漢若
電掃卷吳類風馳功成奉身退書上賜骸歸且棄
人間世帝鄉寧久羈貪天自貽戚震主或見疑伊
人信大雅榮名安可追報享式嘉薦像寢示崇規

蹇劣淹末宦竦躡企前微稽首曷容贊撫心投此
辭

郡齋作

雅志懷山棲復得理山郡蒼岫入南楹白雲帶西
徑雖事簿領勞時與煙霞并心曠眺既遐跡沉尋
亦近下車芳載徂牽牒明兩迅仁靜樂有餘拙遲
澹無競命藻竊清暉濡毫愧靈運

得月亭

清溪一何湛源深白雲曲望舒忽東昇浮光漸西
陸蕪趾匪舊存芳亭煥新築碎璧時復沉散金如

可掬雖乏謝監踪聊寄庾公矚誰謂曠音塵古
共幽獨

遊仙都同樊侍御

寡諍謝晝牘懷仙抗晨旌恠石儼壁立危峯類削
成陽火伏未息陰湖鑿以清下有干霄木上有承
露莖漢武建栢寢秦皇慕蓬瀛惜哉無靈氣安得
遂冲昇軒后獨不朽鼎實垂鴻名柱史良地主邀
我鈞天行黃金九奏發白玉雙童迎聊從避驄路
一展攀髯情

養痾江寺招長公不至

理人媿無術攝已徒嬰患假息贊公舍披味醫王
觀逃虛行滅跡執熱坐揮汗空桑豈常廬聊得慰
懷安美酒非上藥亦足寄情歡鷺峯歛夕霄鷺湖
迴清瀾心將碧雲合日隨弦月殫所期殊未至還
寢獨長歎

二郎回溪詞

事載青田邑誌

謝公永嘉守在郡宥無為敦賞值令弟華萼每相
携躋險既山頓窮源亦水嬉溪名沐鶴是人觀游
龍非駕言輟棹際並影浣紗時凌波餐秀色拾翠
逗芳儀援琴挑未就解佩贈猶疑高唐侈宋玉洛

浦悵陳思抒章但唇動締心空目馳來同湫風止
去作飄雲辭停聲三婦豔嗣響二郎回

樂清登簫臺訪浴簫泉

仙蹤詎可攀荒臺尚堪訪簫弄清泉中舄振紫巖
上波動若鸞沉雲飄似鳧往浮筠本無垢托心在
塵想花溪如有靈應流蓋山響

從軍行二首寄贈楊用修

鴻運纂丕基 龍飛起潛邸 聖孝亶淵衷 徽
猷邁前軌聚訟紛盈庭批鱗抗羣議徒逞折角雄
猶取越樽忌在宥蒙至仁承嘉遠投裔稽首金馬

門傷心碧鷄戍幕府雅好賢辟君掌書記三紀踰
瓜期數口尚匏繫竭來秉憲章欲往閤奇字爲賦
從軍行聊展懷人思

思文際 聖君稽古萃羣辟子雲侍承明胡爲去
荒域被命事犀渠差勝下蠶室憤志鬪八書榮名
重三策丁年子卿嗟皓首仲昇泣看鳶窮瘴煙放
鷄定何日業旣違操觚勲還期累革五月行渡瀘
千里望巴國瀘水向東流巴雲忽西匿相思持寸
心願附雙飛翼

滇省述懷

承嘉理齊安幸校長沙近秉憲按滇中始覺在遐
境譙相反見嗔揖侯乃成釁喻夷辭豈繁威棘法
當峻昆明鳶作池太華鷄爲鎮遲夜召賈生經年
淹許靖霞難駐令顏霜易改衰鬢故人滿清班誰
其枉芳訊龍性未可馴鳳翼胡由奮聊從達士觀
無嗟小人愠

嘉靖庚戌辛亥壬子癸丑甲寅乙卯作見

澶州栝蒼南中集

男琳謹校

皇甫司勳集卷之七

皇甫司勳集卷之八

吳郡

皇甫汭子循

撰

五言古詩二十三首

還山詩四首

少值時運昌因遭世網誤銓宰之明藻官邪以彰
賂申椒詎見芳娥眉祗成妬高揖聊遂初幽貞履
吾素狃犬方吠人站鳶復遭路破甌苟不完奚取
孟生顧虛舟自相觸安得蒙莊怒歸休眷長林途
窮日云暮

炫服耻遊越朱弦謬入齊木疆闕文理君房特妙

詞一丁且未解子雲翻好奇登乘多擁腫徒以先
容貲列肆爭售礧抱璞或致疑蘇糞克華綃芳蘭
委幽哇鉛刀俾操割安用鑊邪為駿足泛清駕寧
肯受鞿羈願為鴻鵠舉寥天戾羽儀

鳩予歸頗怡室人交不喜童子前致辭主人何為
爾昔聞車馬喧盈門結如綺今來雀可羅蓬蒿但
荒里朱幡引鄙夫金章粲誰子百卉榮悴遷四運
代成紀太宰填園扉中丞棄東市羲旨示凶終道
家明殆止儉奴慎勿言嗟哉吾已矣

饗富易决性縻爵豈知身舉國將嚇烏矜位乃驕
人清廟懼為犧綠波思縱鱗陳王蔚文藻憂生慕
仙真江淹摹別狀遨遊窮八垠哲士希昭曠愚者
溘埃塵思徃若遺藁寵來類積薪請從不材壽長
守非病貧

悼亡友周詩二首

昔我求友生周郎早投分藻綴摠玄思雄談發孤
憤壁立常晏如崖檢若垂性落魄懷英風晤言每
祛吝歲中從薄遊時復惠芳訊謝秩始歸田延益
擬開逕詎意雲靡依忽隨露先盡登座揮素琴巡
檐度哀磬遺令眎約終裂書寄遐殯

陶令棄官日徵君寢瘵時巨卿宵夢愕元伯晨計
馳申緘五情塞撫膺雙涕垂既捐韓康肆復捲嚴
平帷冥數豈無驗良藥寧自醫夙昔重季諾感激
平原知雖乏擔石蓄能薄千金施游魂眷仲里託
體虞山隈死生交已謝留恨翟門題

聞郡檄至簡子約

同時叅外庭一朝謝朝列銀羽非難馴所驚峻網
設逸足晞高驥聊以就羈紲予季廟廊姿爲邦茂
時指及朞宣令猷何暮佇來轍承檄懼有愆趨裝
悵無悅曾是東山情薄茲西河烈芳歲若電馳隆
休亦颺瞥翹首關路長寸心念將別

送陸宜甫還洞庭

烈士晞康衢逸人緬幽壑矯翼鮮寧棲潛鱗有深
託陸君箕穎流雅志甘塲藿被褐自行吟持經事
耕作別來歲屢適念往迹猶邈避亂辭東山韜光
翳南郭聿暮促歸心申章敘離索雪積湖上居雲
停林間閣挂席廻青陽援琴遲芳酌願保黃髮期
無渝素心諾

秋夜偶作

晚歲絕外牽懽悰寄所適皓齒發新聲蛾眉矜故

色變態逐情生羽商隨意易冶艷詎有央靡曼信
無極歌方一再聽行期三五夕淫雨忽東來素輝
乍西匿金尊悵屢空玉趾邈難即露砌寒蛩鳴風
窓起嘆息

送兒楸北征四首

竭余解宦日及爾承歡時開室茂林下灌園清溪
湄豈不眷明發胡爲遠別離別離情所難况乃去
庭闈榮名會須早玉體愛無虧夙奉垂堂誠聊以
贈臨岐

岐路邈山川行行感疇昔束髮升華階策足踐文

石多士叅嘉招入朝懷盛飾思作凌霄翰忽爲衝
颶激從事逾三紀歸來徒四壁逢人惠問稀無嗟
不相悉

少乏理人術辭邑願遺榮仰荷

王明眷移署厠儒英崇文闢東序延胄昉西京禮
樂千載會冠蓋四門并鴻都掌故存鳳闕覩新成
惟有青緡業庶可紹家聲

家慶辭南陔江程引西渡稍聞長淮流遙見廣陵
樹從親三入都皆子舊諳路抗志慕遠遊焉得勞
內顧別筵謝蘭芳歸舟理金素曾是桑榆年牽情

日云暮

謁伍相祠

按志城西南三十里胥山上有胥王廟漢以來咸秩祀宋元嘉中始徙城內後屢新之廟貌猶冕服九章襲王封之舊云

志士謝明哲胥君懷謇忠覆郢既云烈強吳亦稱雄逞怨匪報德交亂詎圖功貫矢麾使却脫劍閔途窮鞭平良已酷陷詬竟奚恫載革浮江上抉目窺城東踟躕顧玄寢惻愴歷朱宮冠旒醜生貌服袞垂吾衷一聞歌小海流思託回風

題歛蘇氏四賢樓

四賢者何漢關內侯武唐許國公頊宋叅知政事易簡歛州守壽也武以烈節顯壽以循良稱頊與易簡並擅文苑咸宜秩祀胡父忽諸茲幾世孫明太學生蘇若川追念爾祖建樓以妥靈卜地於弘曠為樓壯麗勝甲歛申嘗遊於余門請題以識若蘇生者可謂昭德揚芬而四賢者亦可以不死矣

倬彼司寇裔誕自昆吾封桓桓起代郡奕奕遷武

功子卿奉漢使亮節匈奴中龍庭歸皓首麟閣展
芳容許公際時昌遂爲唐主佐摘藻埒張燕陳謨
贊機務皇宋舉叅知承明奏辭賦厥胤守歙州斯
民覃慈慕曾是懷土思何如眷仁里歙旣蒙守恩
蘇乃家於此述德發幽潛登禋昭令美拓地構崇
基飛薨列疏綺綺樓一何峻迥接巖雲浮玉几挹
羣岫蘿軒俯雙流佳氣霽日夕靈貺惠春秋子孫
引勿替復始宜公侯

玉几
山名

臘月十五翫月荅子約

園景攬兔升馳光感駒隙西園將密親南樓遲嘉

客生無百年期能幾三五夕旨酒盈樽疊高堂聞
琴瑟請誦唐風詩胡爲坐拘迫棟華眷季方摘藻
凌希逸往晤迹易陳來悰會難逆再滿清夜輝寧
知芳歲隔

夏至病遣

倏感青陽徂俄值朱明屆有滄散朝霖輕寒凝暮
靄如何芳菲日猶是凄其態情闌花鳥餘興遶雲
林外未悟衛生因徒寢謝侯察搔首倦簪裹循腰
緩衣帶風河易招損塵網難祛礙玄思誰與宣勞
歌示茲慨

鬲劉侍御見訊

李生嗟大雅魏主惜通才王風邈已矣斯人安在哉
劉郎挺國秀束髮晞天階影纓隱柱下攬轡歷南臺
姱行末俗詆恩寵中道乖游梁倦棲翼入洛傷羈懷
遂解東都綬聊翦北山萊却掃百慮捐流覽羣言該
縱盼躡霞壑抗跡凌囂埃春徃童冠集夜坐樽壘開
趙瑟既以越秦箏一何哀棣華慙二俊藻詠蒙雙裁
世苦隆暑煩惠然清風來比聲麗金曩炫目皆瓊瑰
申章詎成報抽思屢遲迴幸值賞心晤無使榮名墮

題王元美離菴園

傲吏緬開徑隱侯始卜郊翔圃從藝術抱甕至終
朝荷鋪帶細帙流觀詠楚騷克庭緝蕭艾偃戶翳
蓬蒿蕘菴一何穢毋俾溷申椒芟蘊不及根滋蔓
將盈條弱齡砥姱行束髮就嘉招紉佩躋蘭省炫
服立熙朝君子節彌亮小人道自消蹇芳命良友
抒藻振長謠

荅盧式

王風寢失古頽波蕩自今李生陳大雅劉子抱文
心弱余振鴻藻高議抗詞林歸田守玄默閉關謝

沉吟江左鬱華彥歲暮得盧諶駉驥思長奮良樂
此相尋申章粲如玉感贈重兼金徒然奉清奏何
由爾賞音

張仲讀書吳山

輟養辭南陔駕言邁西郭問子將何之避喧謝羈
縛堂間豈不懷雲林諒有託風叩支關清月鑒董
帷薄披帙就長明靜夜靈花落羊亡屏意筌猿定
故心簫幽谷聞鳥鳴澄湖眺魚樂霞綺雜煙絲桃
柳互紛灼時在塘上篇日積丘中作焉得奮羽翰
因君適寥廓

高樓一何峻贈劉侍御

高樓一何峻迢迢峻而都百尺懸飛陛八窓列交
疏璇題像刻鳳遊極類翔烏信茲蓬萊境曠哉仙
人居夙齡茂文藻委志諷詩書臺端既肅軌河內
亦承符解纓謝神武稅駕凌清虛炎曦戒未垂涼
颯被廣除徵聲理絲竹張讌集簪裾嘉賓傾四座
豐膳出中厨靈妃遞楚舞雙童揚吳斝容成獻瓊
醴長房啓玉壺一飲粲顏色再飲葆令軀願言享
黃髮榮名千載俱

寄題宗室芙蓉園

忘憂楊柳館逍遙芙蓉園粲粲朱華冒圍田綠葉
繁日涉宛成趣竭來殊避喧心將隱淪逸跡謝帝
子尊瑤琴既以御緇帙亦間翻采賦等梁孝敦詩
從楚元美人隔千里幽芳誰爲搴輕舟越江渚欲
往執孤鴛無媒焉所託有懷何由宣申章聊代訊
寤歌在弗諼

嘉靖丙辰丁巳戊午巳未庚申辛酉壬戌
癸亥甲子乙丑丙寅作見山居集

男穀謹校

皇甫司勳集卷之八

皇甫司勳集卷之八

